

HUBUNGAN SEJENIS DAN BAHAYANYA

الْحَمْدُ لِلَّهِ نَحْمَدُهُ وَنَسْتَعِينُهُ وَنَسْتَغْفِرُهُ. وَنَعُوذُ بِاللَّهِ مِنْ شُرُورِ أَنْفُسِنَا وَمِنْ سَيِّئَاتِ
أَعْمَالِنَا. مَنْ يَهْدِهِ اللَّهُ فَلَا مُضِلَّ لَهُ وَمَنْ يَضِلَّ فَلَا هَادِيَ لَهُ.

أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ سَيِّدَنَا مُحَمَّدًا عَبْدَهُ
وَرَسُولَهُ. اللَّهُمَّ صَلِّ وَسَلِّمْ عَلَى سَيِّدِنَا مُحَمَّدٍ وَعَلَى آلِهِ وَأَصْحَابِهِ أَجْمَعِينَ.

أَمَّا بَعْدُ، فَيَا عِبَادَ اللَّهِ، اتَّقُوا اللَّهَ وَأَوْصِيكُمْ وَآيَايَ بِتَقْوَى اللَّهِ، فَقَدْ فَازَ الْمُتَّقُونَ.

Marilah kita bersama-sama meningkatkan ketaqwaan kepada Allah *Subhanahu wa-Ta'ala* dengan melaksanakan segala perintah dan meninggalkan segala larangan-Nya. Mudah-mudahan kita diberkati dan dirahmati Allah *Subhanahu wa-Ta'ala* di dunia dan akhirat.

Sidang Jumaat yang dirahmati Allah *Subhanahu wa-Ta'ala*,

Antara keindahan syariat Islam, adalah merupakan satu agama yang selari dengan fitrah manusia. Allah *Subhanahu wa-Ta'ala* lebih mengetahui apa yang terbaik untuk hamba-Nya. Kisah penciptaan Nabi Allah Adam As dan isterinya Hawa banyak mengajar kepada kita mengenai kehendak fisiologi manusia, seperti keinginan kepada makanan dan juga keperluan untuk hidup berpasang-pasangan.

Atas dasar ini, Islam menggalakkan pernikahan antara lelaki dan wanita, bahkan mempermudah urusan tersebut, bagi membolehkan manusia menyalurkan keperluan jiwa dan nafsunya, melalui jalan yang halal. Pernikahan mampu meningkatkan kasih sayang, seterusnya memperbaiki kerohanian dan meningkatkan produktiviti manusia dalam kehidupan masing-masing.

Akan tetapi agak malang, terdapat sebahagian daripada umat Islam di negara ini, tidak menghargai akan nikmat hidup antara pasangan lelaki dan perempuan yang Allah ciptakan. Ada antara mereka, yang sanggup untuk melepaskan nafsu syahwat mereka melalui hubungan sejenis. Perbuatan terkutuk ini bukanlah satu perkara yang baru dalam masyarakat, malah ia telah wujud sejak zaman Nabi Luth alaihissalam lagi sebagaimana firman Allah *Subhanahu wa-Ta'ala* dalam Surah al-A'raf ayat ke 81:

أَعُوذُ بِاللَّهِ مِنَ الشَّيْطَانِ الرَّجِيمِ

إِنَّكُمْ لَتَأْتُونَ الرِّجَالَ شَهْوَةً مِّنْ دُونِ النِّسَاءِ ۗ بَلْ أَنْتُمْ قَوْمٌ مُّسْرِفُونَ ﴿٨١﴾

Yang bermaksud : "Sesungguhnya kamu mendatangi lelaki untuk memuaskan nafsu syahwat kamu dengan meninggalkan perempuan, bahkan kamu ini adalah kaum yang melampaui batas".

Sidang Jumaat yang dirahmati Allah *Subhanahu wa-Ta'ala*,

Sesungguhnya, adalah besar murka Allah swt terhadap orang lelaki yang mengadakan hubungan sejenis. Ada antara kumpulan ini, bukan sahaja mendatangi lelaki dewasa, tetapi melampau menjadikan kanak-kanak sebagai sasaran syahwat mereka.

Janganlah melihat perkara ini sebagai perkara yang kecil dalam masyarakat kita. Dalam satu kajian Majlis AIDS Malaysia, bilangan penduduk negara kita yang mendapat penyakit berjangkit khususnya melalui hubungan sejenis seperti jangkitan HIV dan AIDS adalah amat membimbangkan.

Statistik daripada kajian yang dilakukan pada tahun 2013, menunjukkan bahawa faktor jangkitan HIV dengan sebab perkongsian jarum suntikan, adalah sama banyak dengan jangkitan disebabkan hubungan homoseksual, pada kadar peratusan sebanyak 22%. Statistik ini adalah terlalu membimbangkan. Ia menunjukkan kadar peratusan pembawa HIV lelaki dalam kalangan pengamal hubungan liwat, adalah amat tinggi.

Sidang Jumaat yang dirahmati Allah *Subhanahu wa-Ta'ala*,

Marilah kita semua mengambil peranan untuk membendung masalah sosial ini daripada terus berlaku di persekitaran kita. Mulakanlah dari rumah dengan memberi kasih sayang yang tidak berbelah bagi kepada anak-anak kita, supaya jiwa mereka penuh dengan perasaan cinta yang sebenar. Didiklah mereka bersesuaian dengan jantina masing-masing, seperti memberikan

permainan, atau galakan bersukan yang bersesuaian dengan jantina anak-anak. Ini amat penting bagi mengelakkan berlakunya kecelaruan jantina.

Selain itu, kita juga wajib berperanan memberikan nasihat dan dorongan agar mereka kembali kepada fitrah yang sebenar. Sekiranya disyaki berlakunya aktiviti maksiat, laporkanlah kepada pihak berkuasa agama.

Sidang Jumaat yang dirahmati Allah *Subhanahu wa-Ta'ala*,

Amat malang apabila ada beberapa NGO di negara ini menyokong serta menerima dana asing untuk menjayakan aktiviti terkutuk ini atas nama hak asasi dan kebebasan manusia.

Inisiatif seumpama ini, adalah amat jelas merupakan agenda kuasa asing, yang mahu kita meniru gaya hidup tidak beragama seperti negara luar. Mereka mahu, secara beransur-ansur, kegiatan yang berkaitan dengan LGBT dan hubungan sejenis ini dihalalkan mengikut lunas undang-undang. Ingatlah amaran Nabi Muhammad Sallallahu Alaihi Wasallam dalam sepotong hadith yang diriwayatkan oleh al-Imam al-Bukhari:

لَتَتَّبِعَنَّ سَنَنَ مَنْ كَانَ قَبْلَكُمْ شِبْرًا شِبْرًا وَذِرَاعًا بِذِرَاعٍ، حَتَّىٰ لَوْ دَخَلُوا
جُحْرَ رَضَبٍ تَبِعْتُمُوهُمْ. قُلْنَا يَا رَسُولَ اللَّهِ الْيَهُودُ وَالنَّصَارَىٰ قَالَ فَمَنْ.

Yang bermaksud : “Sesungguhnya kamu akan mengikuti perilaku orang-orang sebelum kamu sejengkal sejengkal, sehasta demi sehasta, sehingga walaupun mereka masuk ke lubang dhole sekali pun, kamu akan ikut masuk juga”. Para sahabat bertanya: Wahai Rasulullah apakah (yang engkau maksudkan itu adalah) Yahudi dan Nasrani? Maka jawab baginda: *“Siapa lagi (kalau bukan mereka)!”*.

Sebagai mengakhiri khutbah kita pada hari ini, marilah kita bersama-sama menolak kegiatan LGBT yang cuba mempengaruhi masyarakat kita dan ingin menghalalkan hubungan sejenis sebagaimana kaum Nabi Lut yang mempersendakan tegurannya. Firman Allah dalam surah al-A'raf ayat 82 :

أَعُوذُ بِاللَّهِ مِنَ الشَّيْطَانِ الرَّجِيمِ

وَمَا كَانَ جَوَابَ قَوْمِهِ إِلَّا أَنْ قَالُوا أَخْرِجُوهُمْ مِّنْ قَرْيَتِكُمْ إِنَّهُمْ أَنَاسٌ

يَنْظَهُرُونَ ﴿٨٢﴾

Yang bermaksud : Dan tidak ada jawapan daripada kaumnya melainkan berkata: "Usirlah mereka (Nabi Lut dan pengikut-pengikutnya yang taat) dari bandar kamu ini, sesungguhnya mereka adalah orang-orang yang (mendakwa) mensucikan diri".

بَارَكَ اللهُ لِيْ وَلكُمْ فِي الْقُرْآنِ الْعَظِيْمِ، وَنَفَعَنِيْ وَايَاكُمْ بِمَا فِيْهِ مِنَ الْآيَاتِ
وَالذِّكْرِ الْحَكِيْمِ، وَتَقَبَّلَ مِنِّيْ وَمِنْكُمْ تِلَاوَتَهُ، إِنَّهُ هُوَ السَّمِيعُ الْعَلِيْمُ. أَقُولُ
قَوْلِيْ هَذَا وَاسْتَغْفِرُ اللهَ الْعَظِيْمَ لِيْ وَلكُمْ، وَلِسَائِرِ الْمُسْلِمِيْنَ وَالْمُسْلِمَاتِ،
وَالْمُؤْمِنِيْنَ وَالْمُؤْمِنَاتِ، فَاسْتَغْفِرُوْهُ إِنَّهُ هُوَ الْغَفُوْرُ الرَّحِيْمُ.